


Durante periodo di gobernacion 2013-2017

Hopi mas bario ta conoce renobacion, ta bay midi 4 mil tereno y Linear Park ta bay yega te Arashi



ORANJESTAD (AAN): Den su ultimo conferencia di prensa, Minister encarga cu Infraestructura, Benny Sevinger aduna un splicacion amplio di proyectonan cu a wordo ehecuta den e prome gobernacion di Gabinete Mike Eman I y tambe tur loke por spera durante e gobernacion nobo cu a cuminsa dia prome di november ultimo.

Den su presentacion Sevinger a presenta un lista largo di proyectonan cu a keda concretisa den e periodo 2009-2013, pero a pone masha enfasis riba loke ta na caminda. Den e lista cu a keda presenta por mira cu pa loke ta barionan tin 14 proyecto di renobacion cu ta bay den ehecucion y cualnan ta: Montserat; Simeon Antonio; Village (Fase II); Rancho; Sabana Basora; Bushiri (nobo); Zeewijk; Pleinchi di Misa di Santa Cruz; Tarabana; Brazil; Madiki (Fase III); Village (Fase III); Jan Flemming y Mabon.

E proyecto exitoso Linear Park, cual no solamente a

percura pa embeyece un area basta grandi for di rotonde Las Americas te na Cas di Gobernador a pone tambe hopi hende den movecion, usando e ruta pa haci ehercicionan fisico.

Durante e gobernacion anterior a logra finalisa tres parti di e proyecto aki, cual tabata Fase I y II y e rampa pa boto. Den e gobernacion nobo, pueblo di Aruba lo por bay mira un resultado hopi mas grandi di e proyecto aki. Ta cuminsa cu e parti di Linear Park cu ta core for di Brandweer te cu aeropuerto; ta sigui cu instalacion di iluminacion di Linear Park Fase III (Wilhelmina Park te cu porta di waf); Fase IV (Waf – luznan di trafico Fatum/Sun Plaza); Fase V (Fatum/Sun Plaza te cu Westin); Fase VI (Westin te cu Ritz Carlton) y Fase VII



cu ta core for di Ritz Carlton te cu Arashi.

VIVIENDA

Minister Sevinger a splica cu lo sigui cu e maneho di vivienda, tanto pa esnan cu kier construi nan propio cas como bario y cas pa e grandinan.

Den plan ta poni pa wordo ehecuta 10 proyecto cu ta relaciona directamente cu vivienda por ehempel e Cas di Anciano na Noord, cual tabata un di e peticionnan cu Prome Minister Eman a ricibi durante e diferente bishitanan cu el a haci den e bario di Noord. E ta un proyecto combina di FCCA hunto cu Gobierno di Aruba. Ademas di esaki ta bay promove construccion di rond di 200 cas di huur, bou di FCCA, pero tambe lo sigui cu e plan pa otorga rond di 250 hipoteca pa vivienda, anualmente.

Otro proyectonan cu Gobierno ta bay promove ta Centronan di Cuido na Savaneta y Pos Abou; desaroyo di Pos Chikito West, unda lo bin cu un combinacion di vivienda social cu esun publico; parcelacion di tereno den diferente bario pa construi

casnan social pero den forma individual. Ademas di esaki, a traha un plan hunto cu DIP unda cu a pone e meta pa logra midi 4.000 tereno den cuatro aña. “Nos a mira den e ultimo cuatro añanan cu tin un demanda grandi cerca ciudadanonan cu kier tin nan propio cas. Tin mas cu 10 mil peticion haci.” Esaki, el a agrega, ta un di e prioridadnan.

Tambe e mandatario a splica cu tin un demanda pa Cas pa Grandinan, pa cual lo bay trata na concretiza 2 kavel pa bario cual lo ta especificamente pa e meta aki. Esaki ta dirigi riba e grupo di hende grandi cu por biba nan so y no mester di ayudo specialisa. E ultimo dos proyectonan cu el a menciona cu Gobierno kier realiza hunto cu FCCA ta casnan pa huur cu pueblo den e barionan di Tarabana y Montserat.

**Telefonnan di
DIARIO
582-6747
Fax 582-8551**